

KUMPUNAN
KHAUWTLANG NUN
SIAMTHAT

YMA AW



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.20 15th May 2011

Branch YMA President, Secretary leh CEC Member ten Central YMA Hall-ah Emergency Meeting an nei.

Chanmari West, May 15: Ni 9.5.2011 (Thawhtan) zan dar 7:00 kham Aizawl khawpui chhunga Branch YMA President, Secretary leh CEC Member ten Central YMA Hall-ah Emergency Meeting an nei.

He Meeting hi Pu Lal Chungnunga, President, Central YMA-in a kaihrui a, member kal dan hetiang hi a ni. Central YMA OB - 6, CEC - 46, Branch YMA - 154, Total - 206 an ni.

Branch YMA President, Secretary leh CEC Member ten Central YMA Hall-ah Emergency Meeting ah hian 13.4.2011-a CCC Meeting-in hnamdang (Vai) Mistiri hlawh Rs. 300 aia tam lo leh Helper hlawh Rs. 150 aia tam lo a lo bithliah chu Branch tinin chak taka bawhzui a, khuah taka ken kawh nise a ti a, he thutlukna hi Kohhran hrang hrang te an Headquarters theuhah min lo zawm

sak tur ngen nise tih a ni. Hei hi Kohhran hrang hrangah pek nghal an ni baw. Tin, Bank lem chungchang sawizui a ni a, hemi chungchanga Central YMA hmalakna report ngaihthlak a ni a, NEREFS Ltd-in loan an pek chhuahna form-a Branch YMA President te hming ziah hnan ngai a tih chu Central YMA hriatpui loh a ni. He meeting-ah hian Kumpuan bawhzui dan leh Ruihhlo do report te ngaihthlak a ni baw.

CENTRAL YMA NEWS

1. Central YMA-in Platinum Jubilee lawmna atana T-Shirt a siam, hralh bangte chu Home pathum Samaritan Seling, Krista Hnungzuitu Team, Chawnpui leh Hermon Children home-ah te 100 nos theuh pek an ni.
2. Union Home Minister P. Chidambarama'n Mizoram a rawn tlawh dawn a, Tuikuk chungchangah NGO ten thuthlen ve thain hriat a ni a, hemi chungchang ngaihtuah tur hian Ni 14.5.2011 chhun dar 12-ah NGO Joint Meeting Central YMA Office-ah neih a ni ang.
3. Ni 17.5.2011 zan dar 7 hian Central YMA Committee Room-ah CEC Meeting neih a ni ang.



Tlangval tlawmngai ten thlan an lai

Branch News

Karleh lo awm tur Ni 17.5.2011(Thawhle) zan khian rokhawlhna dang a awm loh chuan Branch Executive Committee koh tum a ni.

Ni 9.5.2011 a Edenthar a In 2 kangte tanpui nan kan Branch YMA chuan `1000/-ve ve a pe.

Taitesena Section in Chhiatni Fund `21700/- leh YMA AW man `5760/- Ni 13.5.2011 kham Branch ah an thehlut a, Section dang te pawh a ranglama thehlut thuai tur leh tife theuh turin Br. YMA chuan a ngen tak meuh meuh a ni.

Ni 9.5.2011(Thawhtan) zan kham President leh Secretary te Central YMA Hall-a CEC memberte nen a Emergency Meeting neih na ah an kal.

LUSUN KHAWHAR

Ni 8.5.2011 kham Pu Lalrinliana Pautu 'N' Section hruaitu lo ni tawh leh YMA Life Member ni lai leh Ni 11.5.2011 kham NI R.Lalchhandami D/o R.Lalthankima 'T' Section te chuan min boralsan a, lusun chungte Branch YMA chuan a tawrhpu tak zet a ni.

Keimahni

Section hrang hrang hruaitu thahnemngai taka min rawn tawiawm thin tute chungah lawmthu kan sawi takzet a, kan khawhar min hnem in min tawiawm sauh sauh turin kan ngen a che u.

Article bengvarthlak tak tak kan dawn belh zel e, a tahtawlh te tea rawn tihlan zel tum a ni e.



TUN KAR CHANGVAWN

I naupanna tumahin ngainep suh se; thusawi kawngah te, chetze kawngah te, hmangaih kawngah te, rinna kawngah te, thianghlimna kawngah te ringtute tihhmuhtu ni zawk ang che. I Timothea 4:12

Editorial Board

Editor

RK.Rozidinga
9436142304

Joint Editor :

RK. Malsawmkima
9862578441

News Editor

Tv. Thangkuma
9862303135

Pu Vanlalhluta
9862366308

Tv. Vanlalfawna
9856301975

Cir. Manager

Johny Lalthanpuia
9612359161

Jacob Lalrinsanga
9612319779

Production

Manager
R.Lalmachhuana
9436151817

Branch Office Bearer

President

T.Ngurkhuma
9436190843

Vice President

R.Lalmachhuana
9436151817

Secretary

RL.Thanhnuna
9436152760

Asst. Secretary

K.Darthanthuanga
9436196071

Treasurer

C.Lalzarliana
9436142049

Fin.Secretary

Lalthuamluaia
9612216649

Advisers

Pi Zamanthangi
Pu Vanlalsawma
Pu Rothuama
Pu Lalbiakthanga
Khangte

Nang erawh chu engkimah fimkhur la, hrehawm tuar la, Chanchin Tha hriltu lam hna thawk la, i rawngbawlna kha hlen rawh. II Tim 4:5

Editorial : YMA member chu tanpui ngai te tanpuitu tur kan ni. A mi-ah buai lovin kan thlir dan tur chu Kan tanpui a mamawhem? tih hi ni zel rawh se. He rilru Mizo mize dik tak kan neih hi kan vawn tlat chuan YMA hi a mualpho ngai lovang. Mi hausa leh mi rethei dai kil kara mi lumen zana tam lam a inthlau lovang a, thisen pe tura vantlang mike-a puan nawn fo a ngai hek lovang. Mizo nih nawmna chu chhian thatni a kan intawiawm thin hi a ni. Heng hunah hian YMA membarten tlawmngaihna kan lanchhuah tir theihna a ni tih hria in tan i la thar sauh sauh ang u.

Article :

Vantlang in

- Lalnunthara Sailo

Chhawlbuk leh Rap Inah pawh Lal Isua nen chuan lungawi tur kan nih lai hian a aia ropui in lian leh ropui tak tak kan neihna kan sak pawhin kan lungawi tak tak chuang lo. A aia ropui kan duh leh zel a, thil ropui kan duhna lamah dik leh dik lo pawh kan thliarhrang phal lo thin.

Kan in a thain a ropui tual tuala YMA bungruain hmun a chang pawn tual tuala. YMA hruaituten ngaihtuahna an seng a, Section tin-ah YMA bungraw dahna tur in neih vek thain an hria a, hma an la a, tunah chuan kan vengchhung section tin-ah YMA bungraw dahna tur in a awm ta vek mai. Hmasawna ropui leh hmasawna tangkai tak a ni.

YMA bungraw dahna in hrang hrang ka hmuh hian ka rilruah henge hi a lo lut thin.

Khawtlang neitu VC awm tawh zawng zawngten hma lam hun an thlir thiam loh zia leh vantlang tana hmuhma dah nachang an hriat loh zia hi ka ngaihtuah thin. Tuna YMA bungraw dahna in te hi hmunrem lo tak tak, a nihna takah chuan vawk in sakna tur atana tlak lo deuh vek a ni. Vantlang ta tur thil ruahman lawk nachang hria VC nei thin ila chuan YMA bungraw dahna in hi hmunrem tha leh laili deuhah a ding hlawm ang. Hmun awl vantlang tana dah nachang hre lovin vantlang tna hmun awl kan neihchhun thlanmual hlui (YMA Park) pawh tunah chuan eng pawl pawl emaw in sak nan phalna an pe a, in a khah leh deuh vek tawh hi.

YMA bungrua kawh thin tute inpekna hlut zia hi kan theihngihl mai ang tih ka hlau thin. YMA bungrua kawltute eng hunah pawh tihbuai an nih thin dan te Vantlang tana an inpekna te kha i hre reng ang u.

Section hruaitute tan leh Branch hruaitute tan YMA bungraw dahna in hi in zawng zawng hmuhawm ber pawl a nih ka ring. Vawi tam tak ngaihtuah leh hnatlanga an sak, themthiam deuh leh themtlaw deuhin thahnemngai dan in ang renga an sak a nih avangin lo kunia lo deuh pawh ni se, a hmuhawmna in a uai hneh em avangin a mawiin a kunia tho tho dawn si a. Achhungah an bungraw neih zawng zawng uluk taka remin an dah a, tala tharin an han kalh hnan hmiah mai a, a pawn atangin an han thlir vang vanga, an thilung chung a hlum tak miau avangin lawm loh vin an nui vur vur lo thei lo.

Khawtlang mipuite inpekna hi YMA hruaitute phur taka ke pen tir tu a ni a. Khawtlang mipuite hian YMA bungrua te hi kan tan vek a ni tih kan hriat avangin YMA hmalakna hi kan thlawpa. YMA hruaitute hnung zui zo lo tak tak te pawhin thilpek kawngah thahnem an ngai a. Mahni

theihna mual mualah YMA tan chuan tiin tha kan thawh thin a ni. vengchhung mipuite hian he rilru hi pu tlat ila, he veng hi veng nuam a ni reng thei ang.

YMA bungraw dahna in ka hmuh apiang hian vantlang tan ke ka pen tlem zia ka hrechhuak a. YMA bungraw dahna in sa a hnatlang thinte thlantui far kauh kauh ri ka bengah a lo ri a, ka in sita, an kut chhuak chu ka zaha, ropui ka ti a, min thlamuan bawh thin.

Vantlangin tha leh zung senga an sak In hrim hrim hi a lian emaw a te emaw, a ropui emaw a nep emaw a lo indin chhuah dan ngun taka ngaihtuah tel chuan a ropuiin a mawi lo thei lova, zahawmna pawh a keng tel lo thei lo bawh. YMA bungraw dahna in atanga YMA bungrua an bo mauh mai te hian thin a ti rim thin. YMA bungrua ru duh khawpa rilru chhia pu hi awm lo hram se tih hi ka duhthusam a ni.

YMA bungraw dahna in ka hmuh hian Dolly Parton-i hla PL. Liandinga lehlin kha ka hrechhuak thin. Chu hlaah chuan,

*We got a little simple church nearby
And a promise of mansion in the sky.....
We're rich in things that a dollar bill cannot buy
Rich folks live in a poor folks town.*

(Biakbuk mawl tak si hlu tak chu kan nei, Vana in ropui leh mawi min tiamtu, Kan hauhsakna khawvel sum lei theih loh, Rethei mah i- hausa kan ni.) Hla chu phuah thiam ve ila YMA bungraw dahna in chawi hian hla kan phuah ve tur.

Kan vengah pawh YMA bungraw dahna in tlawm te te te hi vantlang tana tangkai tura sak, mipui tangrualin an tha leh zung, an neih ang ang senga an sak a ni a. In tlawm leh chhete mah ni se, Tlawmngaihna leh Inpekna tea din a nihna hian heng in te hi suma teh theih loh hlutna a neih tir a ni.

IGNOU ADMISSION

Central YMA hnuai IGNOU Special Study Centre ah, heng a hnuai Course te hi May 30, 2011 thleng Admission a la tih theih e.

- Course : BPP (Bachelor Preparatory Programme)
Duration : 6months
Admission Fee : ` 1000/-
Zir thei chin : India khua leh tui kum18 tling chin.
- Course : CDM (Certificate in Disaster Management)
Duration : 6months
Admission Fee : ` 1700/-
Zir thei chin : 10+2 emaw a tlukpui pass tan
- Admission tih nana tul te : Passport Size - 3copies, Tribal & Residential Certificate (Attested), Age Proff Certificate (Birth/Baptisma/Educational Certificate)
Admission Fee hi hmuhlet leh vek theih a ni a, lehkhabu a thlawm a dawn tur a ni bawh. A thlawm liau liau a zirna a ni.

Hrechiang duh tan :

CYMA Office-ah emaw, Coordinatory Dr.C.Lalthlengliana (Mobile-9612163379)

NEUVA

☞ An Fin. Secretary hmasa ber leh Life member ni bawk Pu Lalrinliana Pautu Kum 52 in a boral san chu an uin lusun chhungte an tawrhpu hle.

☞ Nimin Inrinni zing khan High Field ah T-Section hruaitute nen Friendly Match Football khelin hnehna an changa, zanriah tuihnai tak Pasaltha Neuva Inah an kilho nghal a ni.

☞ Nimin Inrinni nileng khan Kuang duan hnatlang an nei a, a tul hun apianga thingzai khawl hmantirtu L.S. Bakery te chhungkaw chungaw lawmthu an sawi.

☞ An hruaitu Pu K. Lalzuithanga Office hna pawimawha Shillong a zin pawh dam takin a lo haw leh ta.

☞ Nilaithawhtan zan hian rokhawlhna a awm loh chuan committee neih tum a ni.

☞ Pi Laibati damlo in lama in enkawl mek chu a dam leh thuai an duhsak.

☞ Chhiatni Fund la pe lo leh khawnte sep dang la pe lote hruaitute a huhova khawn tur a ni a, vawin tlai dar 4:00 ah Pu Lalnunsanga te inah in nghahkhawm tur a ni.

☞ YMA Aw la thar duh chuan Secretary hnenah in hriattir tur a ni.

KHUANGCHERA

☞ YMA Aw man leh Section Budget ` 4500/- chu tlakfel a ni ta.

☞ Section hruaitute leh membete mitthi lumen, khawhar in kal leh thlan laih ah te tun aia tan la thar leh turin an in ngen.

☞ Vengchung a lo thianglim zawk nan mahni in leh a vel tifa theuh turin section mipuite a in ngen.

☞ K-Section hruaitute a ngam apiangin football Friendly Match khel puiah cho theih reng kan ni. Mahse tu chungah mah zahngaihna kan lantir lovang.

☞ Bial hrang hrang vawngtute Tui bill leh Electric bill khawn chungchangah thahnemngai leh zual turin an in ngen.

VANAPA

☞ Kar leh hun remchangah committee neih tum a ni a, hruaitute hun awl lo in siam turin an in hriattir. Tin, thu thehluh tur nei chuan a rang lama Section Secretary hnenah thehluh nise.

☞ Veng chhunga chhiattaw chhungkuate an tawrhpu takzet.

(V-Section Report chhunzawmna)

☞ Section huam chhungah Ui leh Arkhawlaiha a tam leh tawh viau mai a, a neituten khuahkhirh nise an ti.

☞ Hun remchang hmasa berah Vanapa Section YMA Zaipawl Music Video Shooting neih tum a ni a, zaipawl membete lo in ringlawk turin an inhriattir.

☞ Mahni Bial theuha YMA AW man la tifel lo ten tihfel ran theih nise an ti.

☞ North East Sport Festival-a an section atanga Mizoram aiawha kal zawng zawngte an chhuangin lawmman latute zawng zawng an lawmpui takzet a ni.

TAITESENA

☞ Ni 11.5.2011 (Nilaini) khan section chhunga mi NI.R.Lalchhandami D/o R.Lalthankima chu a boral a, lusun chhungte an tuarpuiin Pathian awmpuina leh thlamuanna an chan theih nan duhsakna an hlan.

☞ Pu C.Denghmingthanga (L) kawmthlang (Vaivakawn ramri bul) ah bawlhhlawh paih ching an awm chu an ngaimawh hle a, paih tawh lo tur leh a paihna hmun chauh a paih thin turin an ngen.

☞ Nimin Inrinni zing khan Section hruaitute te leh Neuva Section hruaitute Football math ropui tak leh hlimawm tak khelin a chak zawkah an tang a, Section inpawh nana ruahman a nih ang takin hlawhtling an ti hle. Tlaihah Pasaltha Neuva In ah chawhlui an kilho nghal a ni.

CHAWNGBAWLA

☞ Ni 8.5.2011 (Pathiani) tlai khan an section a damlo Pu Lalrinthanga tuna Nazareth Hospital-a awm mek leh Pu Saithanchhunga tuna Greenwood Hospital a awm mek leh Pi Lalhnuni Newlife Hospital a awm mek chu an kan a, damtak a an lo chhuah leh thuai theih nan duhsakna an hlan.

☞ YMA Park leh kawipui velah bengchheng leh a bul vela mite tana hnawksak an la awm zauh zauh chu an ngaimawh hle a, heng hmuna bengchheng thinte hi ti tawhlo turin an duh hle.

☞ Karleh hun remchangah section committee neih tum a ni a, hruaitute hunawl lo in siam turin an in hriattir.

Sub - Committee Report**PARK SUB-COMMITTEE THUCHHUAK**

YMA Park hi midangte tana hnawksak leh hmuh nuamlo khawpa khawksakna tur a ni lova, dimdawih leh uluk tak a hman tur a ni. Ruih theih thil tih leh bengchhenna hmun atan a hman loh tur a ni tih kan in hriattir a.

Vawn thianglim tur a ni a, heng hi kan zavaia mawhphurhna a ni. Lirthei engpawh zan riah phal a ni lova, insakna hmanrua leh bungrua dah zawk nan kan hman a nih pawhin zan riah tir lova, kan hnuhma te felfai taka tihfai leh vek tur a ni. Thutna siam ah tha taka thut thin nise, a ngenchhan a thu lo tur leh ti bal lo turin Park a kal te ngen kan ni bawk e.

Kan zavaia ta a nih avangin engkim dimdawih leh fai taka enkawl hi kan tih tur a ni tih i hre tlang ang u.

SPORT NEWS**ASIA CHAMPIONSHIP HMACHHAWN TURIN CHANMARI WEST RAWLTHAR**

Ni 15-16 July, 2011 chhunga Qiaoxing Gymnasium, Quanzhou City of Fujian, China rama 11th Asian Karate-Do Federation (AKF) Junior and Cadet Championship 2011 neih turah, India aiawh tur Final Selection Ni 28.5.2011-a New Delhi-a neih tur hmachhawn turin kan veng rawlthar Karate player Vanlalthanpuia S/o TC.Lalremsiama, V-Section chu Junior 55kgs category a khel turin All Mizoram Karate Association (AMKA) leh Mizoram Sport Council chuan a tir liam dawn.

Vanlalthanpuia hian Sate, National Level leh North-East Games ah Gold Medal 23, Silver 3 leh Bronze 3 zet a la tawh a ni. India ram aiawha Asia Junior Karate Championship 2011 khel tur hian tling thei se tih CWSC chuan a duhsakin hetiang dinhmun sang tak luah thei kan nei hi chhuanawm a ti takzet a. Hlawhtlinna chang ngei turin duhsakna an hlan bawk.

SUB-CENTRE NEWS

Chanmari West Sub-Centre-ah Vitamin A solution a lo thleng tawh a, nu ten kan fa te ei tura hruai theuh tur a hriattir kan ni e.

Lehkha kawngbo

Vanlalhruaia, T-36 A, Chanmari West tih chu Axis Bank atangin a lo thleng a, Editor hnenah a lam theih e.

Dan leh Hrai

D.K.Basu Versus State of Bengal (1997 (1) SCC (416) te thubuai chungchangah Supreme Court chuan ni 1.8.1997 khan order a chhuah a, mimal tupawh man/ hren an nih hian an man dan tihfel a nih hmaa Police tena an tih tur thenkhat a duang a, chung te chu -

1. Police hnathawk tupawhin mi an man emaw thu zawhfiah tura an kohin chu police chuan a nihna leh a hmingte chiang taka lanna a nei tur a ni a, Register-ah fel taka ziaklan vek baw tur a ni.

2. Police-in ma a man reng reng hian 'Arrest memo' a siam nghal tur a ni. Chu Arrest memo-ah chuan mi pakhat tal a mi man chhungte emaw, chumi bul hnaivaia mi rintlak in a hriatpuina hming a zia k baw tur a ni. Tin, a mi man pawhin a hming a sign vein an man ni leh man a nih hun (darkar) te a zia k lang tur a ni.

3. Mi tupawh man a nih in emaw, lock up/police Station, etc. a thu zawhfiah tura koh a nihin, an mi man/koha thian pakhat chhungte hnaivai emaw, thian tha emaw a nih loh pawhin an mi mana chhungte hnaivai emaw te a rang thei ang bera hriattir nghal tur a ni. Mahse 'Arrest memo' a hriatpuitute kha chutianga a chhung hnaivaite a nih tho chuan a hranpaa hriattir a tul lem lo.

4. Police chuan mi a mana chhungte/lainate chu District hran/khaw hrana awm an nih chuan telegram-in emaw, chumi khua Legal Aid Organisation kaltlangin emaw Police Station kaltlangin emaw, darkar 8 atanga darkar 12 chhungin an hriattir tur a ni.

5. Mi man (Arrestee) chuan a rang thei ang berin a chhungte hriattir nghal vat chu a dikna (right) a ni tih hriattir tur a ni.

6. Mi mana chu man a nih thu, man a nihna hmunah diary-ah zia kin, a thian thate an m,an thu an va hriattir thu te tilangin an hrenna hmun (Police Station/ Out Post, etc.) te ziahlan tur a ni.

7. Mi mana chuan inhliamna hnuhma a neih leh neih loh te man a nih veleh enfiah a dil chuan enfiah sak vek tur a ni. Chutiang ang hliam lian tham leh te deuh hnuhmate a taksaah an hmu a nih chuan, chhinchhiah ngha;l baw tur a ni. Mi man leh a mantu Police Officer chuan 'Inspection memo' -ah chuan an hming an sign ve ve tur a ni a, an mi man chu 'Inspection memo' copy chu an pe ve ve tur a ni.

8. Mi an man chu Doctor thiam bik, Director, Health Services-in a ruat bik Doctor(Panel of Doctors)- ten darkar 48 danah Medical examination an neih sak tur a ni. Director, Health Services chuan chutiang ang (Panel of Doctors) chu District leh thingtlang khaw tinah a siam tur a ni.

9. A chungah lehkhaw pawimawh kan sawiho bakah 'Arrest memo' zawng zawngte nen chuan Magistrate hnenah a 'record' atan thawn tur a ni.

10. Mi an mana chu thu zawhfiah chhung hun engemawchen chu a Ukil (Advocate) a hmuh phalsak theih a ni a, thu zawhfiah chhung zawng zawng erawhchu nilovin.

11. Police Officer-ten mi an manin, man an nih thu leh police-ten an kaw l a ni tih in hriat pawh zung zung theihna turin Police Control Room State Headquarter leh District tinah neih vek tur a ni. Man an nih atanga darkar 12 chhungin Police Control Room-ah leh Notice Board ualau taka siamah man an nih thu leh an hrenna hmun ziahlan tur a ni.

Khing a chuang tarlan te zawm lo chu Court zahlohna (Contempt of Court) anga ngaih a ni anga, departmental action an chungah lak hial theih a ni ang. Chutiang anga zahlohna thu chu khawi High Court-ah pawh theih theih a ni..... tiin India ram a Court sang ber Supreme Court chuan thu a chhuah a, Mi tupawh Police-in an man dawnin emaw an koh emaw chuan a chungah kan tarlan point 11 te khi an zawh loh chuan Court-a zualko mai tur a ni. Tin, mipui lam pawn hethyl ah hian kan dikna (right) kan hriat a pawimawh khawp mai. Supreme Court thu remna hi Court hniam zawkah chuan dan ang a pawm tur a ni. Mi an man dawn a Police-ten an tih tur leh zawm tur te hi India ram pumah mipui ten an hriat thieh nan State Sawrkar-ah leh AIR leh Doordarshan te puang zar turin Supreme Court hian a ti baw k a ni. Mizoram-a Police ten mi an man emaw thu zawhfiah tura an koh hian khing a chungah kan tarlan te khi an zawm loh pawh in kan hrilh hriat a tul khawp mai.

(Remchang a awm chuan karleh Issue-ah Kut Kawl (Hand cuff) chungchang kan chhuah leh dawn nia)

HETAH HIAN SMS LA

>>9774170328<<

Neuva Section huamchhunga hmun pawimawh Turning Point leh Tuikhur bul Street Light thla khat chuang eng tawh lo hi Local Council te hian hmalak dan an hre lo em ni le !

986238_54

CH-Section Pi Thanghrimi In leh Pu Dawnga In inkar vela zan rei tak tak thlenga khawlaia bengchheng thin te kha sim tawh teh u, in changkan loh zia leh in class san loh zia in tlangau pui mai mai a ni e. In nu leh pa disipline that loh zia in mualpho tel baw k a nia aw.

977413_58

YMA Park chung atanga kawnga ek tui rawn sah tu kha chhung lam leh pawn lam lo in enfiah teh, a tenawm hle mai !

879402_85

YMA Park chungah awm chhun pachanga ek tui rawn sah tu khan park chung kawngpheia awm te min zah lo hle mai. Zing tawngtai inkhawm taima hle mahla i ek pah tir dan in i mizia a pholang. Kawngpheia ah hian veng hmangaihtu kan awm a kawng tih hnaw k leh tih tawp kan phallo tih kan hriattir a che.

986290_81

Damdiai Sarep zawrhna a tanga Biak In panna kawngpui sir a motor dah te hian dah tawh loh nise a va lawmawm dawn ve. Sunday tiam in.

961538_26

YMA Information atang hian mumal zawkin a tlangau theih loh em ni. Mi chi hrang hrang tawng hriatchian theih mang lo an au nuai nuai mai hi chu a ninawm tawh hle mai. A au tu tur mumal leh nghet zawk dah dan te hi a awm zawk lo maw.

943638_00

(SMS kan dawn te hi Ed. Bd ngaih dan a ni vek kher lo)

i-One Multi-Brand

TV + USB support, LCD/LED + Tata Sky free, Washing Machine, Fridge, Inverter, Microwave Oven, Fire Extinguisher tha leh tlawm kan nei e. SCOOTY leh LCD 32" man theihna Coupon kan pe tel baw k.

i-One Multi-Brand Vaivakawn

Near : Zotlang peng Ph:9862492830

(4-4)